



Schweizerische Eidgenossenschaft
Confédération suisse
Confederazione Svizzera
Confederaziun svizra

Chanzlia federala ChF
Servetschs linguistics centrals, Secziun da terminologia ^
rumantsch@bk.admin.ch

Directivas da la Chanzlia federala per la redacziun e translaziun da texts uffizials da la Confederaziun en rumantsch

dals 30 d'avust 2014

stabilidas cun il consentiment da:

- Servetsch da translaziuns, Chanzlia chantunala dal Grischun, Cuira
- Partizun Linguistica applitgada, Lia Rumantscha, Cuira
- Secziun da linguistica rumantscha, Universitat da Friburg

Intenziun

Questas directivas duain contribuir a l'unifurmitad, la coerenza, la clerezza e la cunituitad dals texts uffizials da la Confederaziun ed èn in instrument da laver per tut las persunas participadas a la redacziun e translaziun da texts rumantschs da la Confederaziun destinads a las burgaisas ed als burgais da lingua rumantscha. Ellas valan oravant tut per ils texts normatifs e per ils texts publitgads en il Fegl uffizial federal ed en la Collecziun sistematica dal dretg federal, èn dentant da princip impegnativas per tut las translaziuns en rumantsch fatgas per incumbensa da l'administraziun federala. L'observaziun da las directivas sco tala na garantescha anc betg la qualitat linguistica. La coerenza dals texts uffizials testimoniescha dentant tranter auter l'attenziun che vegn prestada a la forma ed als princips da redacziun per texts uffizials definids en l'artitgel 7, alinea 1 da la lescha da linguis federala (LLing): «Las autoritads federalas sa stentan da duvral ina lingua adequata, clera e chapaivla sco er formulaziuns betg sexistas.»

Reglas da basa

Tut ils texts uffizials publitgads da la Confederaziun vegnan redigids u translatads tenor l'artitgel 6, alinea 3 da la LLing en rumantsch grischun (rg). Per la scripziun dal rg valan da princip las endataziuns dal Pledari Grond da la Lia Rumantscha e las reglas ortograficas e grammaticalas stabilidas en la Grammatica per l'instrucziun dal rumantsch grischun da Caduff / Caprez / Darms (2009) a l'Universitat da Friburg e. Quai vala cunzunt er per la separaziun dals pleds (§319-321) e per las reglas da comma (§322-326).

Maiusclas e minusclas

Las reglas per il diever da maiusclas e minusclas da la Grammatica per l'instrucziun dal rumantsch grischun (§314-318) valan cun excepziun dal paragraf 318 cumplainamain er per ils texts uffizials da la Confederaziun. Per consequenza scrivan ins cun maiuscla:

- ils nums da publicaziuns (vair §314):
Bulletin uffizial, Fegl uffizial federal (FF), Collecziun sistematica dal dretg federal (CS), euv.
- **l'emprim pled** da las designaziuns complettas dals departaments, uffizis, servetschs e da las secziuns, divisiuns, cumissiuns, conferenzas e d'autras organisaziuns politicas da la Confederaziun (vair §316):
Departament federal da l'intern (DFI), Uffizi da cultura (UFC), Chanzlia federala (ChF), Servetschs linguistics centrals, Secziun dretgs politcs, Divisiun taliana, Tribunal federal, Cumissiun per la politica exteriura, Conferenza naziunala davart il federalissem, Banca naziunala svizra, euv.

Parzialmain encunter las reglas ortograficas da la Grammatica per l'instrucziun dal rumantsch grischun (§318, ch'ins vegn dentant a modifitgar) pretenda la Chanzlia federala per il rumantsch grischun en ils texts uffizials da l'administraziun federala la scripziun cun maiuscla da **l'emprim pled** da las designaziuns uffizialas e complettas da tut las instanzas politicas e giudizialas da la Confederaziun. Quai contribuescha a l'unifurmitad, a la coerenza e clerezza dals texts uffizials da la Confederaziun che vegnan publitgads adina almain en traes linguis, savens dentant en quatter u tschintg linguis parallelamain. Las normas ortograficas uffizialas e las reglas internas da la Confederaziun per il diever da maiusclas e minusclas en franzos e talian èn en quest cas la baza per la scripziun dals terms concernids en ils texts uffizials rumantschs da la Confederaziun. Per ils cas nua ch'il diever da maiusclas e minusclas dal franzos e dal talian divergescha, vala per il rumantsch la scripziun cun minuscla. La scripziun uffiziala da las instanzas politicas e giudizialas en texts da la Confederaziun la suandanta è damai la suandanta:

- Confederaziun, Cussegli federal, Cussegli naziunal, Cussegli dals chantuns, Assamblea federala, Parlament federal, Regenza federala, euv. (Las denominaziuns «parlament svizzer» e «regenza svizra» pon ins duvrar, ellas n'èn dentant betg uffizialas.)

Medemamain cun maiuscla vegn scrit **l'emprim pled** da las designaziuns uffizialas e complettas da:

- texts normatifs e giuridics federrals (oravant tut en titels):
Constituziun federala (da la Confederaziun svizra), Lescha federala davart las linguis naziunalas e la chapientscha tranter las cuminanzas linguisticas, Cudesch penal svizzer, Ordinaziun davart la furmazion professiunala. Quai vala er per la furma curta da la denominaziun uffiziala dals medems documents savens duvrada pli frequentamain: p.ex. Lescha da linguis (LLing) Ordinaziun da

linguas (OLing) u tar ils titels curts uffizials d'iniziativas dal pievel: Iniziativa per salaris minimals, Iniziativa da l'aur, euv.

- edifizis da la Confederaziun e la Plaza federala:
Chasa federala, Plaza federala, euv. (Per «Parlamentsgebäude» pon ins duvrar «edifizi dal parlament», quai n'è dentant betg ina denominaziun uffiziala.)

Cun minuscla scrivan ins tut ils ulteriurs pleuds simpels e cumponids che na vegnan betg scrits cun maiuscla tenor ils paragrafs 314-318 da la Grammatica per l'instrucziun dal rumantsch grischun, en particular er:

- las designaziuns d'instancias politicas e giudizialas cur ch'ellas èn generalas u vegnan utilisadas en furma inuffiziala u betg completta: il parlament (er: il parlament svizzer), la regenza (er: la regenza svizra), la cumissiun, il tribunal, il cussegl, ils uffizis federales, euv. Medemamain cun minuscla scrivan ins «l'administraziun federala».
- las designaziuns da leschas cur ch'ellas èn generalas u en lur furma inuffiziala: la constituziun, la lescha da /as linguas, euv.
- las denominaziuns da persunas: la presidenta, il cusseglier federal, la cussegliera dals chantuns, la chanceliera federala, il schef dal departament, euv.

Ulteriuras observaziuns

Tenor la LLing art. 7, al. 1, èn tant redacturs sco translatur da texts uffizials da la Confederaziun dumandads da «da duvrar ina lingua adequata, clera e chapaivla sco er formulaziuns na sexistas». Gista per il rumantsch, nua ch'il register uffizial ed elevà è pauc usitâ, duain las stentas per ina lingua «clera e chapaivla» esser sistematicas e cuntinuantas. In text uffizial na sto betg per mort e fin esser elevâ, el sto en emprima lingia esser bain legibel ed «autentic». Flosclas vidas e translaziuns litteralas rinforzan la percepcziun dal rumantsch grischun en texts uffizials sco «lingua artifiziala». Gista per las translaturas ed ils translaturas rumantschs ch'en bilings e san savens almain uschè bain tudestg sco rumantsch, è il prender distanza dal tudestg ina sfida constanta.

Ils servetschs linguistics da la Chanzlia federala sa stentan da duvrar «formulaziuns na sexistas». Sch'i n'è betg pussaivel da chattar ina formulaziun neutrala, dovran ils servetschs linguistics da las linguas latinas en confrunt cun il Servetsch linguistic tudestg pli restrictivamain las denominaziuns da funcziuns en il feminin. Per la denominaziun d'ina funcziun u d'in titel en general che na sa referescha betg a persunas specificas dovran ins en las linguas latinas per motivs da chapibilitad e congruenza mo il substantiv masculin (p.ex. ils cussegliers naziunals). Ils substantivs masculins cumpigliant tenor il diever quotidian da las linguas latinas tant dunnas sco umens. Per precisar poi dentant mintgatant esser inditgà da duvrar tuttas duas furmas. Il diever frequent da tuttas duas furmas vegn però validà sco pesant e po evocar ambiguitads sch'el n'è betg extremamain consequent.

Tar l'indicaziun da datas scrivan ins per regla il di e l'onn cun cifras arabas, il mais en bustabs (ils 12 da matg 2010); sch'ins scursanescha la data dovran ins stritgs d'uniun (12-05-2010).

Per possibilizar il diever d'ina lingua ritga e variada na vul la Chanzlia federala betg stabilir reglas uni- taras per la schelta tranter sinonims, differentas scripziuns da terms e diversas pussavladads grammaticalas (p.ex. per il verb reflexiv en il perfect). Quai vegn surlaschà al sentiment linguistic da mintga translatura e da mintga translatur u a las directivas da las diversas instituziuns.